

Zeitschrift: Adelbodmer Heimatbrief
Herausgeber: Stiftung Dorfarchiv Adelboden
Band: 69 (2008)

Artikel: Eröffnung des Dorfarchivs Adelboden, Freitag 13.6.08 (Bärgrächnig)
Autor: Bärtschi, Christian
DOI: <https://doi.org/10.5169/seals-1062778>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 12.03.2026

ETH-Bibliothek Zürich, E-Periodica, <https://www.e-periodica.ch>

Unsere Zeit steht in Gottes Händen

Du weisst nicht, was die Zukunft schickt,
Ob Segen, Glück, ob Schmerz und Leid,
So nütze nur den Augenblick,
Der einzig deine Zeit.

Was grämt sich deine Seele
Ums ungewisse Morgen,
Was dir dann frommt und fehle
Bleibt Gott doch nicht verborgen.

Der flücht'gen Jahre schnellen Lauf
Hälst du in ihrem Strom nicht auf
Und kannst sie auch nicht wenden.

Mach auf dein Ende dich bereit
Und nütze weise deine Zeit:
Sie steht in Gottes Händen.

Ulrike Mahling-Frey

Eröffnung des Dorfarchivs Adelboden, Freitag, 13.6.08 (Bärgrächnig)

Liebi Adelbodmerine, liebi Adelbodmer, sehr verehrti Gescht

Obwohl wir hüt Fritig u zudäm nog der 13. schribe, wiwer nät aberglüübisch sy. Wir fiire-n-e bsundriga Tag, wonus mit grosser Gnuegtuig erfüllt. Öppis ischt müglig worde, vo däm ig i däre Form vor Jahre nog nät hetti z'truume gwagt. Ds Dorfarchiv Adelbode ischt Realität worde! Wir dörfes hüt mitemene „Tag der offenen Tür“ iiweie.

Aagfange hets für mig vor oppa emne halbe Dotze Jahre. Der liider allzu früi verstrobnig, uvergässlig Gemiindschryber Peter Oester het

mig dennzumale-n-aagfragt, ob ig, zsäme mit mire Frau, bereit wee, das im fiischtere Gmiindsarchiv iiglagerete Bärtschi-Archiv i d'Ornig ztue u z'registriere. Wir hii spontan zuegsiit – ohne allerdings no z'wüsse, uf was wir üüs da yglaa hii. Aber schliesslich ischt der Alfrid Bärtschi e Namensvetter u Verwandta von mir gsy u zudäm hii wer og persönlig äs grosses Inträsse a däre umfangryyche hischtorische Sammlig gha. Obwohl scho vom Jakob Pieren u vom Kobi Aellig wärtvoli Vorarbiit gliischtet worden ischt, sy wer oppa 30 Tag im „tiefen Keller“ gsy, hi gsichtet, gsortiert un uber 150 Archivtrucki gfüllt ... Än ähndligi Arbiit het der Hansruedi Mader mit dem Aellig-Archiv ndernoh. Wo wer due sy fertig gsy, isch ds Stund var Wahrhiit choe: Wo chönnten di wärtvole Beständ underbbracht u der Allgemiinhit zuegänglich gmacht wärde? U hie mues u darf ig jitz dem Gmiirat von Adelboden e tola Bärghbluemechranz winde. Di damaligi Gmiirätin Chrischtine Buuma het sig dr Sach aagnoh u het erreicht, dass üüs der Gmiirat – i Zämenarbiit mit dem Chilchgmiirat – g'eigneti Lokalitäte zur Verfügig gstellt het u si o nog grad uf Gmiindschöschte für üüsi Zwäcke het la istand stele.

So hi-n-in der Altjahrswuche 2007 die Archivalie in di nüwe Lokalitäte im Undergschos vom Pfarrhuus chöne züglet wärde. Dermit ischt og äs jahrelangs Aalige vom Kobi Aellig in Erfülig ggange: Am Tag vor sym Tod het sys umfangricha Archivmaterial e nüwi u definitivi Underkunft gfunde.

In däm Zämehang ischt d'Stiffig „Dorfarchiv Adelbode“ gründet worde, un als eerschi Yylag het der Gmiirat der nüwe Stiffig ds gmindsiigeta Bärtschi-Archiv gschenkt. Sehr glücklich sy wer og dadruher gsy, dass d'Erbe vom Dr. Jakob Aellig di von ima dur Jahrzähnte gsammlete, üssert umfangryche Materialie zur Dorfgschicht äbefalls oni Wenn und Aber der nüwe Stiffig gschenkt hii. – Äs ischt mer hie es grosses Aalige, allne Stifter ihri Schenkigi härzlig z'verdanke – im Bsundere dem Gmiirat und der Frau Margret Aellig u de Chind vom Kobi.

D Gmiind Adelbode het ihres Dorf-Archiv. Die Tatsach ischt inzigartig, u-n-ig sine, das äs nume wenig Gmiinde vo üüser Grössig git, wo sig wägere söltige kulturelle Tat dörfe rüeme!

Äs Archiv isch so öppis wie-n-es Gedächtnis vonere Gmiind oder vonere Talschaft. U das Gedächtnis stiit jitz allne Interessierte zur Verfügig. Laie u Forscher hii ab hüt Zuetritt zu däm „gsammlete

Wüsse“. Wir wüsse aber: Äs Gedächtnis funktioniert nume, wemas og brucht. Üuser Archivbestand söle nät verstuube. U hie möchte-n-ig nog en Ufruef biifüege. Im Archiv, wa wer hüt iiweihe, het nog viel Platz. Wär oppa nog alti Buecher, Dokument, Fotografie oder ähnligi Sache het u die nät dehiime welti guume, isch fründlig iiglade, die Sache üusem Archiv z’überlah. Kontaktperson uf em Platz ischt d Frau Silvia Büschle, u.a. im Gmiindshus tätig.

Im Herbscht 1947, wa der eerscht Hiimatbrief ischt erschine, hii d’Gründerväter ir Yylitig gschribe: „Wohl kennen wir alle den einzigen Trost im Leben und Sterben, aber erst jetzt kommt uns klarer zum Bewusstsein, dass wir auch die Pflicht haben, die uns von Gott anvertraute irdische Heimat besser zu hüten, schöner zu gestalten und kräftiger zu ehren ...“ Der glyych Zwäck verfolge wir og mit dem hüt eröffnete Archiv. Der Stiftigsrat vor Stiffig „Dorfarchiv Adelbode“ cha sig also däre Zielsetzig vo dennzumale voll u ganz aaschliesse!

Härzliga Dank für öwi Ufmerksamkiit un öws Inträsse.

Christian Bärtschi

Stiftung Dorfarchiv Adelboden

Im Untergeschoss des Pfarrhauses Adelboden,
Haltenstrasse 2, 3715 Adelboden

Archiv und Leseraum sind jeweils am ersten Samstag
jeden Monats für die Öffentlichkeit geöffnet (10.00 – 16.00)